

**Inatsisartut aalajangiiffigisassaattut siunnersuutigineqarpoq Naalackersuisut  
peqquneqassasut aalisarnermut akuersissutit kommuninit tamakkiisumik  
ingerlanneqalissasut.**

(Inatsisartunut ilaasortaq Henrik Fleischer, Siumut)

**Akissuteqaat**

(Aalisarnermut, Piniarnermut Nunalerinermullu Naalackersuisoq)

**Siullermeerneqarnera**

Aalisarsinnaanermut akuersissutinik isumaginnittarnerup kommuninut tamakkiisumik ingerlanneqalernissaat pillugu Naalackersuisut peqquneqarnissaannik Inatsisartut aalajangiiffigisassaattut siunnersuummik siunnersuuteqartumut Henrik Fleischerimut, Siumut, Naalackersuisut qujapput.

Naalackersuisut 2014-imiit 2018-imut naalackersuisooqatigiinnissamik isumaqatigiisummik tunngaveqarlutik oqaluuserisassatut immikkoortumik UKA-2016/123 saqqummiinikuupput, saqqummiussamilu aalisarsinnaanermut akuersissutinik tunniussisarnerup ineriartortinnissaa kommuninullu tunniunneqarnissaa siunertarinearpoq. Aalisarsinnaanermut akuersissutinik aqutsinerup kommuninut nuunneqarnissaannut kissaateqartoqarnera qinnuteqartut aalajangiiffigineqarnissaminnut akuersissutinilluunniit tunineqarnissaminnut utaqqivallaannginnissaa-nik tunngavigineqarpoq. Naalackersuisut tassunga atatillugu tunniussisarnermut atortoq Aalipi 2017-imi atulterpaat ineriartortitsiffigalugulu. Aalipi umiatsiaaqqanut meterit arfinillit angullugit angissusilinnut aalisarsinnaanermut akuersissutinut qinnuteqarnissamut nutarteri-nissamullu kommunit atortorivaat. Matumani saarullinnut, qaleralinnut nipisanullu akuersis-sutit inuussutissarsiuugalugulu piniarnermut allagartat pineqarput. 2018-imilu kapisilinnut akuersissutit Aalipimi sulianut ilanngunneqarput.

Naalackersuisut aalisarsinnaanermut akuersissutinik suliaqartarnerup tunniussisarnerullu pisariaqanngitsumik utaqqeqaarnani sukkasuumik naammaginarumillu suliarisalernissaat pingaartippaat. Naalackersuisullu nuannaarutigegalugu nalunaarutigissavaat aalisarsinnaa-nermut akuersissutinik tunniussisarnerup Aalipi aqutugalugu kommuninut iluatsilluartumik tunniunneqarsimammata.

Aalipi-mik ineriartortitsinerup kingunerisimavaa 2017-imi umiatsiaaqqanut aalisarsinnaa-nermut akuersissutit 4.551-it tunniunneqarsimanerat, taakkunanngalu 73 %-it aalisarsinnaa-nermut akuersissutit tassalu 3.325-it kommuninit tunniunneqarsimammata. 2018-imi umiat-siaaqqanut aalisarsinnaanermut akuersissutit 5.708-t tunniunneqarput, taakkunanngalu 80 %-it tassalu 4.561-t kommuninit tunniunneqarput. 2019-imut tunngatillugu aprilip qulingat tikillugu umiatsiaaqqanut akuersissutit 3.828-it tunniunneqarsimapput, taakkunanngalu 86 %-it tassalu 3.342-t kommuninit tunniunneqarsimapput. Tassunga atatillugu oqaatigineqassaaq

umiatsiaaqqanut akuersissutit amerlarpasinneri pissuteqarmat aalisartup ataatsip akuersissutinik arlalinnik peqarsinnaanera, soorlu saarullinnut, qaleralinnut, nipisanut kapisilinnullu. Taamaammallu umiatsiaaqqanut akuersissutit amerlassusaat amerlasoorujussuartut isikkoqarsinnaallutik.

Naalackersuisut nalunaarutigisinnaavaat aalisarsinnaanermut akuersissutit kommuninut nuunneqarnerisa kingunerisimammassuk qinnuteqaaterpassuit siusinnerusukkut Naalackersuisoqarfiup utaqqisitsinermik kingunilimmik tigoorartarsimasai massakkut pisarunnaarmata. Peqatigitillugulu aalisartut kommunini assigiinngitsuniittut Naalackersuisoqarfik utaqqeqqaarnagu ukiup nikinneratigut akuersissutinik ingerlaannartumik tunineqarsinnaalernertik malugeqqavaat. Akuersissutit Aalipi aqutugalugu tunniunneqartartut ingerlaannartumillu akuersissutigineqartartut amerlassusaat maanna 90 %-imiippoq, umiatsiaaqqamik saarulliniartut qaleralinniartullu akuersissutit Aalipi-kkut tunniunneqartartut maanna 97-99 %-imiillutik.

Sinerissap qanittuani umiatsiaaqqanut aalisarsinnaanermut akuersissutit Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 8, 8. april 2016-imeersumi § 8, imm. 2 naapertorlugu suliarineqartarput. Naalackersuisoqarfiup pingaartippaa qinnuteqartut qinnuteqaataat peqqissaartumik inatsisillu atuuttut tunngavigalugit assigiiartumik suliarineqartassasut. Naalackersuisut isumaqarput sinerissap qanittuani umiatsiaararsorluni aalisarnissamut siullermeerlutik qinnuteqartut qitiusumiit sullinneqartassasut tamatumani qinnuteqartut peqqissaartumik assigiiartumillu sullinneqarnissaat pillugu.

Naalackersuisut isumaqarput sinerissap qanittuani angallatinut meterit arfinillit qaangerlugit angissusilinnut aamma avataasiortunut aalisarsinnaanermut akuersissutinut qinnuteqaatinik naalackersuisoqarfik suliarinnittassasoq. Angallatinut meterit arfinilinnik takinerusunut piunasaqaatit naammassisassat amerlanerupput, tamannalu pissutigalugu umiatsiaaqqanut akuersissutinut sanilliullugu suliat sukumiinerusumik suliarineqartarlutik. Piunasaqaatit naammassisassat amerlanerunerinut tunngasut tassaapput aalisariutit skibsregister-imi nalunaarsugaasimanissaat, piginnittuunernut tunngasut naammassineqarsimanersut misissorneqartarnissaat, aalisariutit ataasiakkaat Søfartsstyrelse-miit akuerineqarsimanersut kiisalu nunami sumi angerlarsimaffeqarnermut tunngatillugu uppernarsaatit piunasaqaatit naammassineqarsimanersut. Aalisarsinnaanermut akuersissutinut ataasiakkaanut tunngatillugu pisassanik imaluunniit pisassiissutinik pigisanut tunngasunik aallaaveqartunik apeqqutit, tulaassisussaatitaanermut tunngasut, aqutsiveqarfinnut assigiinngitsunut aalisarfissat agguarneqarneri il. il. Tamakkuninnga aqutsineq ingerlatsivimmi pilersinneqareersumi ingerlalluurtumi qitiusumik aqutsineq ingerlanneqareerpoq.

Tamatumalu saniatigut naalakkersooqatigiinnissamik isumaqatigiissuteqartut aalisarnermut piniarnermullu allagartanut atortoq nutarteriffiginialugu isumaqatigiissuteqarsimapput. Taamatut sulineq imminut ataqatigeeqqissaartariaqarpoq ingerlaavartumik ineriartortittariaqarlunilu naleqqussartariaqartoq. Taamatut allanngui neq aningaasartuutitaqartussaavoq. Taamaammatt Naalakkersuisut aaqiissutissamik sivisuumik attanneqarsinnaasumik kissaateqarput, tamannalu aqutigalugu aalisarnermik inuussutissarsiuteqarneq tamarmiusumik iluaqusissavaa. Taamatut allannguinissap kingunissai tamakkiisumik suli qulaajarneqanngillat, taamaammallu Naalakkersuisut isumaqarput akuersissutinut tunniussisarnermut atortoq tamakkerlugu allanngortivitsinnagu tamakkiisumik aaqiissuteqarnissaq utaqeqqaartariaqassasoq.

Naalakkersuisut taamatut oqaaseqarlutik aalajangiiffigisassatut siunnersuutip itigartitsissutigineqarnissaa inassutigaat.